

Vorrede.

zu vnsern zeitē vil mehr künst erfunden seyen/ dan die alten gehabt habē / fürnemlichē aber in kriegs rüstungen/ in Druckerēy/ in wasserbewen/ in vestungen / in freyen künsten/ vnd etlichen handtwercken.

Fürwar so vil mich belanget/ halte ichs dafür/ vnd verstande dise frag also/ das Gott der Allmechtig seine gaben deren vnzalbar seind / wunderbarlichen auß theyle/ vnd ihn vilerley vnaußsprechliche weg/ auch nicht zu allen zeiten/ sonder zu etlichē zeitē/ auch nicht auß dis mal alle sampt mit einander/ sonder etwan dise geben/ zu der zeit der welt/ andere zu anderen zeiten/ vnd die selbigen entweder vil vnd vberflüssig/ oder gar wenig / also das solche kaum geachtet werden vnd solches nach der welt/ der zeit/ vnd anderer vmbstend/ die er in seinem raht fürgenommen hat/ gelegenheit.

Dan zu der zeit der Richter/ Saüls/ vñ Dauidis/ hatt er herzliche gewaltige dapffere kriegsleüt geben/ die stehetige krieg geführt haben/ so wol bey den Heyden als bey den Juden. Zu der zeit Salomonis warde ein fridliche zeit/ vnd hielt man vil mehr auß weißheit/ verstandt vnd klügheit/ dann auß kriegsrüstung/ vnd was künstlich war/ das hielt man hoch. Zu der zeit vnd hernas her waren in Grecia/ in Aegypto vil hochgelehrte verstendige leüt / die alle künst herfür suchten/